

DISPUTATIO MEDICA
De
PULSU,
Quam
ANNUENTE DI-
VINO NUMINE

Ac
Amplissima Facultate Medica
Consentiente,

Sub
PRÆSIDIO
JACOBI JENCKENAU

Med. Doct. & Prof. Ord. Tert.
Præceptoris sui fidelissimi

Ac
Patroni & Fautoris ad cineres usque colendi,
Publicæ philiatrorum ventilationi

submittit
RESPONDENS
ULRICUS WILHELMUS RHODE,

Edwalâ Curonus, Med. St.
IN AUDITORIO MAJORI
ad d. II. Novemb. MDCCXVI. H. S.

REGIOMONTI, Typis ZÆNCKERIANIS,

*Serenissimo atque Celsissimo
Principi ac Domino,*

**DOMINO
FERDINANDO,**

*In Livonia, Curlandiæ,
Semigalliæ &c. &c.*

D U C I,

*Principi ac Domino suo
Clementissimo,
Gratiosissimo.*



Q. D. B. D.

PRÆLOQUIUM.



Uantæ utilitatis Medici circulationis sanguinis inventum censuerint, tot tantaque ab iis de eâdem conscripta testantur volumina; Videlicet non desunt, qui omnes morbos à circulationis massæ sanguineæ vitiis propullulare profitentur: Tantæ haud immeritò si non majoris dignitatis facimus cognitionem causæ efficientis modò dictæ circulationis, quippè causa potior est suo effectû, plures quidem circulationis sanguinis, secundum seriem ipsarum communiter proponi solitarum, enumerari possent causæ, v. gr. materialis, formalis, finalis. &c. Ast cum Medici in eruendis morborum causis efficientem præcipuè spectent, Ita in status Sanitatis causis enodandis, vi contrariorum, efficientis cognitionis contenti sunt, qualem, circulationis sanguinis dicimus cordis & arteriarum esse pulsum. Hujus genuina cognitio tantò ardentius investiganda est, quantò plures inde proma-

A

promanant in universam medicinam utilitates, haud incassum igitur nos laboraturos confidimus, si meditationes nostras de pulsu cordis arteriarumque, speciminis academici locô, è cathedrâ publicâ proposuerimus. Quod ut in Altissimi gloriam fiat, faxit Summum Numen feleciter.

DISPUTATIO MEDICA

De

PULSU.

§. I.



Uid igitur Medicis pulsus nomine veniat, in vulgus innotuit, ut supervacaneum sit, etymo vocis pluribus inhærere, sufficit percepisse, pulsûs nomine eam cordis ac arteriarum venire potestatem, quâ tangentium seu explorantium digitos aut manus per communia corporis integumenta, quasi ferire ac sic pulsare percipiuntur, undè quoque hæc dictarum partium actio, Pulsus seu Pulsatio dicitur. In se autem spectatus pulsus nihil aliud est, quam motus fibrarum musculosarum cordis & arteriarum automaticus, per vicissitudines contractorius & dilatatorius, quô mediante cordis atque arteriarum cavitates coarctantur & amplificantur, proveniens ab influxu motûs spirituum in illas sc: fibras, ex cordis ac arteriarum constructionis necessitate ita dispositas, ut reciprocè irritatæ, alternatim quoque corrugentur ac extendantur

dantur, ad cavitatum seu thalamorum aut ventriculorum systolen atque diastolen producendum & sic ad sanguinis aliorumque humorum circulationem ac motum instituentum, promovendum ac continuandum, ut nutritio corporis ejusque partium (ni quid impediat) & secretiones humorum utriusque generis ritè succedant, corpusve nostrum consequenter in statu integritatis conservetur.

§. II.

E datâ hâc descriptione, duplex consideranda venit pulsûs causa, nimirum efficiens & dispositiva seu instrumentalis, quæ tanquam sociæ, ad producendum pulsationis effectum concurrunt: Etenim quod hic est instrumentum (vel si mavis) subjectum motûs simpliciter considerati, id, propter certam ac determinatam partium suarum dispositionem & structuram evadit causa, propter quam motus hic magis seu præcipuè talis est & non alius, atque ea propter merè automaticus seu vitalis, cum animæ rationalis voluntatis desiderio nullatenus subjectus sit uti jam jam, ex sequentibus clarè elucebit.

§. III.

Quod causam efficientem concernit, diximus, eandem esse influxum motûs spirituum in fibras carneas partium motui pulsatorio dicatarum: Quemadmodum enim, nullum in universô corpore humanô celebrari partium solidarum observamus motum, qui â fibris carneis sive in certos fasciculos collectis, sive inter alias membranas, pro rei exigentiâ concinne, dispositis, non dependeat; Ita hic quoque a fibris ejusmodi muscularibus proveniet, neminem quippè fore credimus, qui hodiè amplius de substan-

tiâ cordis carneâ seu musculosa dubius esse possit aut velit, five cor credat musculus generaliter sumptum, five sui generis &c. Nobis id enim perindè est, quoniam nihilose-
 ciùs præter connexionis modum, eundem communibus cum reliquis musculis proprietatibus ac affectionibus præ-
 ditum esse, eò ipsò consentire cogitur, quod totam ejus substantiam pulsationi inservientem è fibris carneis in fas-
 ciculos, primò minores & hinc per tendines, quos ventris nomine interjacent, in veros musculos collectis, compactam esse, oculis videat: his itaque ex rei veritate suppositis, perspicuum est, motum cordis tanquam musculi, ortum suum debere communi motûs musculorum causæ, nimirum influxui motûs spirituum animalium, qui per nervos cardiacos à pari vago potissimum oriundos, continuò eò, quemadmodum ad alios quoslibet musculos, per proprios nervos ipsis dicatos feruntur, ut cuilibet in cerebro institutæ irritationi quasi obedire & sic officium suum obire, h. e. fibras musculares ad sui contractionem irritare queant.

§. IV.

Par ratio est motûs pulsatorii arteriarum, hæ enim suis quoque gaudent fibris motoriis, vel si mavis musculosis seu carneis torosis, quæ ab influxu motûs spirituum eodem modò irritatæ & contractionem & dilatationem arteriarum moliuntur; quatuor enim arteriæ gaudent tunicis, partim firmitati, partim verò motui ipsarum inservientibus. Prima namquè seu extrema vasculosa dicta, uti & altera, quæ glandulosa audit, vasis ipsius constitutioni ac firmitati potissimum dicatæ sunt, tertia verò, tota musculosa est, & admodum crassa, fibris carneis annularibus

seria

§
seriatim sibi impositis, ac superstratis constans, quæ hinc
procul dubiò, integra motus ipsius instrumentum proxi-
mum est; quarta tandem iterum est membranacea, sed
fibras simul rectas, sive longitudinales, juxta se invicem
ferè parallelas, per totam vasis longitudinem excurrentes,
possidens, internè levissima & hinc necessario usui utri-
que destinata, sed quid multis probare nitimur verbis, ubi
res adeò est manifesta, dictorum autem ratio inferius pa-
tebit.

§. V.

A spiritibus, tanquam omnium partium musculosa-
rum motûs causâ, motum quoque pulsatorium cordis &
arteriarum, vi dictorum derivandum esse, vix quenquam
reperiemus seriò dissentientem aut contradicentem, verum
in modo, quo dictæ partes à spiritibus moventur à recepta
hactenus ab authoribus recedimus opinione, firmissimè sta-
tuentes, non ut communiter creditur, influxum ipsorum
spirituum, sed influxum saltem motûs spirituum, esse ge-
nuinam & adæquatam vibrationis cordis & arteriarum cau-
sam: Quis namque monstrare valet, locum asservationis,
tantæ spirituum copiae, quanta vel unicò temporis momen-
tò in musculos, motui saltem automatico inservientes ir-
ruere, & substantiâ suâ ex eo influere deberet, relictâ in
eòdem, tanta illorum quantitate, ut singulis momentis, suc-
cedere novi ejusdem multitudinis queant, quod tamen im-
possibile, sive per modum inflationis, sive expansionis, ex-
plosionis, aut dilatationis &c. influxum illum concipias, ut
taceamus motum voluntarium, non rarò vehementissimum,
simul celebratum; Ut autem arduum hocce negotium, ac-

curatius percipere queamus, placet hîc distinctionem apponere, inter spiritus insitos, & influos, non quidem eâ, ut huc usque factum sententiâ acceptos, sed per hos seu spiritus influos intelligendo, spiritus tanquam subtilissimam atque æthereâ haud absimilem substantiam, in glandulis corticalis cerebri substantiâ, è massâ sanguineâ secretam, continuò per nervos ad partes carnosas defluentem inque iis collectam, donec à quâcunque causâ irritata fibras musculares laceffet, & ad motum proritet; Simile quid, in nervis sensui inservientibus observatur, quippè, ad eosdem perpetuò (ni quid obsistat) novi derivantur spiritus, ut recipiendo diversissimas ab objectis externis excitatas motuum species consumpti, indefinenter restaurentur, ne aliquando deficient sensuique obesse queant; Quemadmodum & hic nervi motibus corporis partium ministrantes, quamdiu spirituum materia, per glandulas cerebri suppeditatur, iisdem infarciuntur; Illi verò, seu spiritus insiti, nihil aliud nobis sunt, quam ii ipsi Spiritus, in cerebrò exorti, atque in hanc vel illam partem depositi, inque eâ in futurum usum asservati, ut hâc ratione non essentiâ, sed diversò duntaxat considerandi modò iidem inter se differant, quatenus hi jam perfecti & collecti, illi verò exorientes, & congregandi, ejusdem sunt materiæ & essentiæ. Si itaque, per hunc vel illum nervum, ad partem hanc vel illam musculosam tendentem, irritationis vel vellicationis motus perveniat, tunc pars ista, à percepto hîc irritationis motu, crispari cogitur, atque sic musculus ejusdem, propter certum quem obtinet situm, ob partium suarum dispositionem, necessariò aut contrahitur aut extenditur, undè tam varii
& mi-

& mirandi motuum musculorum effectus exoriuntur, quod verò sine affluxu seu influxu spirituum, qualis hactenus creditus fuit, cordis fibræ nihilominus contrahi & dilatarique queant, patet per experimentum ubique obvium, si sc. cor animalis viventis, a corpore suo avulsum, & in tabulâ sepositum, tamdiu detineatur, donec omnis motus cessasse, idque planè emortuum videatur, cultellorum acie, vel aciculis pungatur, aut guttis aquæ calidæ, super ipsum instillatis vellicetur, illicò motum admodum sensibilem recuperat eumque aliquoties repetitis vicibus continuat, profectò non aliundè, quàm à spirituum fibrarum cordis incolarum, quos infitos nominavimus, irritatione, ut his rectè perspectis & intellectis, sine violento spirituum influxu, aut sanguinis copiarum auxiliatricum affluxu, motus musculorum longè accuratius demonstrari queat.

§. VI.

Quamvis hæc quidem manifesta sint, motusque partium musculosarum inde generaliter intelligi possit, nondum tamen patet ratio, motus Cordis & arteriarum reciproci, quare eam quoque lustrare operæ erit pretium, diximus autem in pulsûs descriptione, ex constructionis torosarum fibrarum carnearum cordis & arteriarum necessitate, quâ fibræ eorum carneæ ita dispositæ sunt, ut reciprocè irritatæ, alternatim quoque corrugentur & extendantur, undè necessariò cordis dilatatio & contractio sequi cogitur; Quod attinet motum contractionis cordis & arteriarum, nemo dubitabit, ab enumeratis fibris harum partium musculosis, eundem excitari, dum omnes hâc in re habeamus consentientes, sed de dilatationis ejusdem atque arte-

arteriarum motu, erit quæstio magis dubia, omnes enim, quantum scimus, dilatationem dictorum vasorum ab irruente in dictas cavitates, ibidemque aut effervescente, aut ebulliente, aut fermentante, nescimus cujus fictitii fermenti causâ, sanguine provenire docent: ast nos demonstrabimus, sanguinem irruere in cordis thalamos & arteriarum cavitatem, propterea, quod dilatentur antequàm sanguis irrumpat, ut hâc ratione dilatatio ventriculorum cordis naturâ, uti dicitur, prior sit ipso sanguinis in eosdem illapsu. Cor quod concernit, structura ejus accuratius inspicienda est, etenim tot diversas fibrarum cordis series, unicæ ejusdem constrictioni dicatas esse, conceptu perquam difficile est, dispositionem autem fibrarum adeò diversarum, longè aliud quid, majoris usûs altiorisve indaginis esse, persuasissimi sumus: Si enim consideremus situm fibrarum, inveniemus fibras incurvatas transversim ab uno ventriculo, oppositâ serie ad alterum obliquè cum curvaturâ notabili terminantes reliquasve qualitercunque rectas, deprehendemus, eas cordis dilatationi esse dicatas, spirales verò ejusdem elongationi seu constrictioni inservire, sive enim per irritationem fibrarum à motûs spirituum influxu factam, velut id paulò ante explicavimus, seu cum aliis supponamus (quod tamen non concesserimus) per inflationem fibrarum, ab influxu spirituum sive tantum, sive & sanguinis simul ortam, muscutorum motum derivemus, necessariò tamen concedendum nobis erit, ab irritatione fibrarum aliarum contractionem, ab aliarum verò dilatationem derivandam esse: etenim, dum illæ irritatæ rigescunt, h. e. secundum latitudinem dilatantur, & secundum longitudinem ab-

brevian-

breviantur, necessariò lineam affectant rectam, quare latera cordis opposita disjungere i. e. cor ipsum dilatare coguntur, hæ verò s. spirales eodem modo affectæ, ob dictam fibrarum dispositionem, necessariò cordis elongationem atque sic ejusdem inevitabilem constrictionem producant.

§. VII.

Quando igitur ob corrugationem fibrarum rectarum, transversalium & curvarum, ab alterò cordis ventriculò ad alterum tendentium ipsum Cor dilatatur, atque sic ejus cavitas, post expressum sangvinem, vacua relinquitur, propter rarefactam in cordis thalamis materiam ætheream, s. ut Cartesiani loqui amant, primi elementi necessum est, succedere debere aliquid è vicinia per quamcunque concessam viam; quoniam verò regressus sanguinis expulsi ob valvularum semilunarium resistantiam impeditur, valvulæ verò tricuspidales seu mitrales ita dispositæ sunt ut promptè humoribus ad cor ingressum concedant, regressum verò prohibeant, hinc inevitabiliter ex auriculis & consequenter venis irruere oportet sanguinem in ils contentum, qui illapsus ejusdem promovetur ab aliquali venarum motu, qui tamen magis resistantiæ quam constrictionis est; idem enim hic contingit, quod in siphone syringis aquæ immerso, in quem adducto embolo, aqua succedit, aut in recipiente vitreo, ex quo mediante antlia pneumatica aer exhaustus est, in quod aquæ immersum, per apertum epistomium aqua in expansi aeris aut ætheris locum violenter irruit: Quemadmodum autem hisce in casibus omnia simul fieri apparent,

B natura

natura tamen præcedere debet emboli motus aquæ ascensum; Ita quoque sanguinis è venis in cordis ventriculos il-lapsus, eodem apparenter fit momento quò cordis ipsius dilatatio, hæc tamen, vi dictorum, naturâ priori, veluti hæc omnia, veritati non reluctanti perspectissima sunt.

§. VIII.

Quùm, quæ hætenus de modò recipiendi sangvinem in cordis thalamos diximus, adeò manifesta sunt, ut ulteriori demonstratione haut indigeant, monstrandum tamen nobis incumbit, quâ ratione è corde sanguis in arterias migret. Hic autem quædam exoritur difficultas, dum experientiâ teste nec quòpiam contradicente observamus, pulsationem cordis & arteriarum simul seu unò eodemque celebrari temporis momentò, unde orta inter Medicos est quæstio: An, quoniam cor & arteriæ simul digitos tangentium feriunt seu pulsant, eadem quoque simul seu eòdem tempore constringantur & dilatentur? Quæ quæstio antequàm rei veritatem expiscari licet, in antecessum diluenda nobis visa est, ne in propositione ejusdem inutilibus involvamus difficultatibus; Prius verò, quam directè ad modò dictam interrogationem respondeamus, dirimendæ veniunt duæ aliæ in proposita latentes, vel si mavis eandem immediatè præcedentes: Prima est, an cor tempore suæ contractionis aut dilatationis manum tangentis percutiat? Altera eodem recidit, an sc: Arteriæ digitos tangentium momentò suæ contractionis vel dilatationis feriant? Ad priorem respondemus, cor pulsare quando contrahitur: Ad posteriorem, arterias idem efficere quando dilatantur.

§. IX.

Quoniam verò dixisse quicquam in re tam ardua non sufficit, sed demonstrasse idem præstat ac requiritur, notandum est, cor in mediò circiter thoracis, à mediastinò obliquè suspensum ita detineri, ut, dum coni inverfi figuram obtinet, basis ejus quæ mollior est sursum latus dextrum respiciat, vertex verò seu apex ejus, qui durior existit deorsum versus latus sinistrum thoracis dirigatur, in quò latere sub mamillâ pulsatio ejus communiter percipitur, quando itaque cor per fibras §.6. expositas dilatatur, cuspis ejus necessario ad basin suam adducitur & sic ipsum cor abbreviatur, in quò dilatationis actu, quippè conò curtiori reddito, profectò nullâ ratione latus sinistrum ferire potest, dum sc. eò ipsò ab eodem recedit: Ubi verò ipsum cor iterum per motûs sui vicissitudinem contrahitur ut cavitates ejus angustentur, tunc id simul notabiliter elongatur, atque sic, apice fuò sinistrum latus & per consequens manum vel digitos tangentium ferit. Arterias quod concrenit, non facile adducemur, ut credamus, à solò sangvinis è corde, mediante ipsius contractione propulsi impetu, easdem dilatari, quippè quantitas unicâ vice è corde expulsa tanto systemate arterioso, quantum in corpore nostro existit, replendo ac dilatando longè impar est, notissimum enim est arterias parcam respectu venarum in se continere sangvinis quantitatem, easque, post obitum plerumquè sanguine seu cruore vacuas observari, quare paucus ille sanguis per vicissitudines arteriis injectus, non erit genuina dilatationis earundum causa, sed ad communes omnium partium motores sc. fibras,

carneas torosas, hic iterum erit provocandum, atque sic firmiter statuimus arterias per fibras circulares dilatari, per rectas verò & quodammodò obliquas constringi, ob rationes §. 6. circa rationem motûs cordis à nobis allatas, hic verò brevitatis causâ non repetendas; Ex hisce autem manifestissimum est, arterias digitos tangentium tempore suæ dilatationis, non verò contractionis pulsare, quod vel indè corroborari possit, quoniam sanguis nihil nisi liquor quidam est, qui propulsus in canalem arteriosum modò demonstratâ ratione dilatatum, motum suum secundum longitudinem vasorum quæ intrat, vi determinationis ipsius motûs sui à dispositione eorundem dependentis continuare cogitur, vix aliter quàm sui copia ad arteriarum dilatationem conferre valet, quæ tamen re accuratiùs perspectâ reverà tanta non est, ut tot tantosquè diversos pulsuum effectus producere valeat, quicquid in contrarium proferre conati sint, negotium pulsationis non intrinsecè satis perlustrantes; Ebullitionem enim aut effervescentiam sanguinis pro cordis & arteriarum dilatatione adduci solitam, jam ut ignorantiaæ asylum & naturæ, uti dicitur, impossibile quid, cordati dudum rejecerunt Medici.

§. X.

Hisce præmissis, facile solvimus quæstionem, sub initium §. 8. propositam, dicendô, quoniam arteriæ dilatantur dum cor constringitur, valvulæque cordis ita dispositæ sunt, (uti supra meminimus) ut in cordis dilatatione sanguini ingressum è venis per auriculas in cavitates suas, utpotè è venâ cavâ in dextram & è venâ pulmona-

monali in sinistram, aſt vice verſa in ejusdem contractione ſangvini exitum ad arterias, nimirum è dextrò cordis ventriculò in arteriam pulmonalem, è ſiniſtrò verò in aortam ſeu magnam concedant, neceſſum eſt, ut ſangvis, corde ſe eòdem temporis momentò conſtringente quò arteriæ dilatantur, atque ſic ſimul digitos explorantium feriunt, vi contractionis cordis in dilatatas arterias propellatur, quod toties repetitur quoties cor comprimitur & arteriæ ſimul dilatantur h. e. quamdiu fibræ utrorumque carneæ ab influxu motûs ſpirituum irritantur ac vellicantur, quemadmodum ex oppoſito toties novus ſubindè ſangvis è venis in cor irruit, quoties aliæ, huic actioni deſtinatæ ſupra memoratæ fibræ, per viciffitudines influxûs motûs ſpirituum ad cordis dilatationem proritantur ac incitantur.

§. XI.

Utilitatem, quam cordis atquè arteriarum motus pulſatorius in oeconomia corporis humani præſtat, quod concernit, maximam eam atquè ſummè neceſſariam deprehendimus, quàmprimùm enim tempore conceptionis foetûs in utero ſtamina ovuli muliebris futuri foetûs omnimodam delineationem realem ſeu prima rudimenta complectentia, ab aurâ ſeminali viri exagitantur, humores in ipsis quoquè novam motûs determinationem acquirunt, à quò motu & ipſi ità determinantur, ut proprios generent corpusculo ſuo convenientes ſpiritus, quos primò deprehendere licet in corculi foetus ſeu puncti ſalientis ſubſultatione, quæ hâc ratione

primam humorum noviter concepti foetus ac sanguinis circulationem instituit, quæ tractu temporis, incremente foetu continuatur ac promovetur, hæc enim sanguinis circulatio est primus motus cordis & arteriarum effectus & proximus eorundem finis,isque adeò necessarius, ut sine sanguinis circulatione vita hominis ne momentum quidem persistere queat, ut hâc ratione vita corporis sit in sanguine, sc. vi impulsus cordis & arteriarum in circulum agitato; ab hoc sanguinis motu circulatorio tanquam causa efficiente proxima, dependet ipsius corporis nutritio & in junioribus accretio, humorum tum utilium tum excrementitiorum secretiones &c. quæ omnia si ritè succedant, pulsusve omni tempore, secundum omnes circumstantias æqualis sit, integritatis machinæ corporis nostri indicia sunt nosque inde sani dicimur.

§. XII.

Quandoquidem autem omnis virtus ac robur tam totius corporis quam partium ejusdem ab activitate spirituum eorumve, cuique temperamento conveniente quantitate dependet, nec non vi hætenus dictorum & demonstratorum pulsus quoque ab eorundem motus influxu provenit, haud difficile jam erit ex pulsus varietate diversa roboris spirituum atque hinc pendentium reliquarum corporis partium facultatum ac virium eruerè judicia, & status corporis præternaturalis seu à sanitatis tramite deflectentis cognoscere circumstantias, quod ut ordine certò proponamus, attendemus ad præcipuas pulsum in statu præternaturali observabiles differentias, à qui-

à quibus reliquæ omnes hætenus excogitatæ dependent, aut saltem ad easdem referri possunt.

§. XIII.

Quoniam ex hætenus dictis, pulsus est functio in œconomiâ corporis nostri in statu integritatis constituti automatica seu actio vitalis, quæ diversimodè lædi potest veluti id è symptomatum cognitione patescit; Symptomata autem actionum læsarum, plerumque numerantur quadruplicia, quatenus scil. actio quædam vel augetur l. imminuitur l. aboletur vel deniquè depravatur, igitur & pulsus dictis modis lædi seu vitiari poterit, undè alius erit pulsus nimium auctus qualis imprimis observatur in cordis palpitatione, alius imminutus qualemprehendimus in lypothimia, vel abolitus veluti est asphyxia, vel denique depravatus in cordis tremore aliisque pulsus p. n. varietatibus, de quibus speciatim hæc vice plura proferre morbosque eorum, cum æthiologiis & curationibus subjicere velle proposita vetat dissertationis nostræ brevitatis: Siccô tamen non possumus præterire pede quasdam varietates pulsuum in statu corporis humani præternaturali reperibiles, ut habeamus exempla, quibus sententiæ nostræ valorem & robur illustremus, demonstraturi, quâ ratione Medicus ex his fundamentis de morborum statu tam præsentis, quam futuro certior reddi queat, quamdiu enim pulsus ex omni parte æqualis deprehenditur, denotat spirituum in cerebro generationem & motûs eorundem influxum convenientem ac illæsum, atquè hinc debiti virium, roboris in omnibus
mei-

membris eundem admittentibus integritatem, & sic sanitatis, in actionum mediocritate consistentis signum est, quando verò ab hoc salutari statu recedere observatur pulsus, præternaturalis audit & pro varietate differentiarum suarum, diversa quoque in morbis præbet signa tam diagnostica quam prognostica, quæ potissimum à diversa ratione influxus motûs spirituum derivantur, quem simul ipsemet pulsus indicat uti è sequentibus patebit..

§. XIV.

Non autem opus esse ducimus, omnes ab authoribus, non rarò sine ratione excogitatas pulsuum differentias huc apponere, sed potius sufficere arbitramur, si speciminis locò potissimas saltem easque sæpiusculè in morbis variis occurrentes tetigerimus, ut appareat, quâ ratione ex hypothesi à nobis proposita, omnia phœnomena circa pulsum occurrentia clarè & distinctè explicari queant, ex horum numerò sunt, oppositis juxta se positis, ut veritas magis elucescat, Pulsus 1.) magnus & parvus; 2) vehemens & debilis; 3) celer & tardus; 4) frequens & rarus; 5) æqualis vel inæqualis; 6) durus & mollis & similes aliæ pulsuum differentię, quas è cognitis modo enumeratis augurari & colligere facile posse quemlibet confidimus, quare brevitati studentes, enarratas saltem, proposito ordine explicatas dabimus.

§. XV.

Magnus itaque primò pulsus Medicis audit, qui secundum latitudinem arteriæ pulsantis magnum latumque suæ distensionis tangentium digitis exhibet spatium, & apices

pices eorum suâ latitudine ferè totos occupare percipitur, cum è contrariò parvus vocetur pulsus, qui tempore distensionis arteriæ parvum, imò justò minus seu valdè angustum in digitis tangentium ferire spatium observatur, ita ut arteria justò angustior & arctior videatur & amplitudo ejus sæpè vix setæ aut pili latitudini comparari queat; Ille sc. magnus aut amplus, à largiori insitorum spirituum irritantium copiâ derivandus est, hincve virium robur adesse significat, siquidem à spirituum animalium dispositione, virium totius corporis dependet activitas, deindè concludimus è pulsu magno massam sanguineam minus corruptam esse, nec motum ejus intestinum à statu integritatis adeò recessisse, quippè generatio spirituum haud interpolata eorumquè determinatio ad viscera vitalia neutiquàm corrupta deprehenditur, undè in iis morbis in quibus talis est pulsus, is Medicum semper benè sperare jubet ægrumvè evasurum tutò prædicere posse eum docet, si verò morbus sit valdè magnus & periculosus, morbi saltem longitudinem arguit, quoniam ferendo morbo ægroti vires pares esse certò certius monstrat: Ille verò si parvus e contrâ, spirituum defectum & hinc eorum secretionem impeditam esse vel ob sanguinis corruptionem vel ob defectum succi (omnium partium sicve & spirituum) salubilis sanguini inesse debiti, undè virium langvorem & absentem morbo resistendi potestatem denotat, hinc malus prædicatur, quoniam cæteris paribus aut mortem ipsam, aut morbi in subjecto aliàs egregii corporis habitus longitudinem, aut saltem ipsius dubium eventum significat.

§. XVI.

Secundò, vehemens seu fortis aut robustus pulsus is appellatur, qui digitos eundem explorantium consuetò ac justò validius nec non cum aliquali resistantia & digitos removendi nisu percutit, ubi ex opposito pulsus debilis seu imbecillis vel langvidus digitos blandè ferit, ut non rarò vix percipi queat & inter explorationem præcipuè si arteria profundius sita sit, ne quidem sui existentiam præbet (quò in casu tamen sc. si uno in loco non reperiatur in alio quærendus est); Ille sc. fortis à spirituum motûs influxu impetuosiori venit, indicante eorum generationis materiam in sanguine copiosè adesse, undè quoquè virium præsentiam arguit ac spem salutis recuperandæ firmat, in morbis verò periculosis, eorum longitudinem vi §. proximè præcedentis, in magnis verò obstructionibus crisin expectandam esse significat, spem enim facit Medico, fore, ut obstructiones à virtute humorum circulantium deoppilentur & obstructionis materia criticè evacuetur; hic verò seu debilis spirituum animalium inopiam ac langvorem denotat & indè vires pro gradu debilitatis diverso magis vel minus prostratas esse, hinc omni periculo non vacat, præprimis in gravioribus morbis: in morbis acutis autem debilis existens & talis per singula morborum ejusmodi tempora perdurans, cum respirationis difficultate, signum lethale exhibet, omnimodam enim spirituum consumptionem tum è pulsus langvore tum è respirationis difficultate sine dubio argumentamur.

§. XVII.

Tertio, pulsus celer seu velox dicitur in quo arteria cum sensibili quâdam velocitate ac si elaterem quis resilire patiatur, dilatatur & hinc rursus contrahitur, revertente
 mox

mox distensionis celeritate; Pulsus verò tardus ex adverso est, in quò ægrè attolluntur latera arteriarum ipsæquè lentò motu dilatantur, perindè ac elater a pondere quòpiam suppressus aut aggravatus lentè restituere sese annititur; Ille seu velox ab acceleratò motûs spirituum influxu, dependente ab ipsorum agilitate ac subtilitate nec non aliquantum inæquali in poris cerebri versùs utrasvè fibras motrices determinatione, indicat nihilominus fontem originis spirituum minus esse perturbatum, attamen ad turbationem suæ mixtionis proclivem, undè ad febres inclinare ægrotos conjicimus, hinc si celer & frequens (de quò mox in proximè sequenti §.) simul pulsus fuerit, certissimum præsentis febris seu turbatæ sangvinis mixtionis, ex motu ejus intestinò turbulentò ortæ signum præbet; celer verò & magnus, virium conservatæ integritatis indicium est; Velox contra & parvus mali sæpè solet esse ominis, eò quod ad turbationem mixtionis propendentem sangvinem spirituum generandorum materiâ destitutum esse arguat; Ille verò seu tardus contrarium significat, sc. spirituum (pro parvitatibus gradu) defectum, virium langvorem & motum sangvinis utrumquè imminutum unde eum periculo non vacare auguramur.

§. XVIII.

Quartò, frequens quem & crebrum vocant, ita dicitur ab ictuum digitos expiscantium pulsandi crebritate, quâ unus ictus alterum tantâ sæpè insequitur frequentia, ut numerando haud rarò vix assequi pulsationes invicem subsequentes liceat Medico, ita, ut quod fuit celeritas in expansione arteriæ in pulsu veloci, hic sit crebritas ictuum arteriæ in pulsationis continuatione, quarè non facile confundetur, qui hanc probè attendet utriusquè differentiam; Vice ver-

si pulsus rarus est cujus ictus seu vibrationes longiori temporis intervallò à se invicem distare observantur, ita ut inter quamlibet ejus vibrationem mora quædam notabilis eaque interdum satis longa intercedat & numeranti pulsationes expectationis tædium oboriatur: Ille seu frequens, à crebriori fibrarum carnearum arterias dilatantium & contractantium irritatione producitur, dum spiritus justò & consuetò copiosius secreti, motu suo indefinenter in easdem feruntur seu influunt, hinc indicat motum præcipuè intestinum sanguinis p. n. exagitatum, & sic ipsius massæ exæstuationem atque inde calorem totius corporis p. n. auctum, è quibus jam magis elucescit significationis ratio, qua §. proxime præcedente diximus pulsum celerem & frequentem simul, febrem indicare; haud rarò autem accidit, ut in aliqua saltem corporis parte pulsus observetur frequentia in reliquis verò conveniens deprehendatur, ast tunc concludimus circa eam corporis regionem (tanquam denominationis morbi subiectum) in subjacente viscere aut parte quadam, vel si exterior corporis pars ea sit in ipsa hædere inflammationem, efficientem ut motus sanguinis progressivus in eadem (velut in subiecto radicali) impeditus, in intestinum mutetur, atque ita M. S. quadantenus turbet, quare sæpè febris inflammatoria comes esse solet, unde per consensum irritatum cerebrum ad partes vim causandi obtinentes spirituum motum frequentius determinari patitur: Ille verò seu rarus, si simul celer & magnus fuerit non est adeo periculosus, dispositionem enim pororum cerebri & spirituum generationem non omnimodè perturbatas esse denotat; Si autem rarus pulsus simul parvus, debilis & tardus deprehenditur, periculosissimus existit, & si (pro morbi cujusvis indole) diutius perduret, ægrum

exinsperatō interitarum certō indicat, quod nostrates vocare solent, *Er oder Sie wird ausgehen / wie ein Licht.*

§. XIX.

Omnes hæc pulsum differentia à nobis enumeratæ, vel sub æqualitate vel sub inæqualitate quadam occurrunt, undè & pulsus quinto, vel æqualis est vel inæqualis: æqualis autem est vel simpliciter vel secundum quid talis: Pulsus simpliciter æqualis est, in quō omnia occurrentia phænomena æqualia deprehenduntur, ita ut ratione magnitudinis & parvitas in omnibus ictibus seu vibrationibus arteria continuò eandem servet sui dilatationem, ab eâq; neque secundum majus aut minus recedat, ratione vehementiæ & debilitatis perpetuò digitos explorantis eadem fortitudine petat, ratione celeritatis & tarditatis semper eandem pulsationum ab invicem servet distantiam, ratione crebritatis & raritatis continuâ frequentia similitudine ictus ictum excipiat atque sic nusquam ac nullibi ab æqualitatis normâ aberret, sed ex omni parte undiquè æqualis observetur, de quō supra §. 13. locuti sumus ut proponeremus regulam recti ad facilius cognoscendum obliquum; Secundum quid æqualis autem is dicitur pulsus, qui vel in unâ datarum differentiarum, vel in quibusdam saltem æqualis deprehenditur, in aliis autem aliquam tangenti exhibet inæqualitatem, & ne hic quidem est adeò malæ notæ præcipuè si æqualitatis signa, signa inæqualitatis superent, indicant enim influxum motûs spirituum non omninò turbatum nec pororum cerebri generationi eorundem inservientium sensibilem destructionem eosquè à massa sanguineâ adhuc convenienter satis secerni ac in nervos sequestrari: Inæqualis verò pulsus audit, qui ab omnibus vel plurimis rectitudinis paulò ante à nobis pro-

positis regulis deflectit, dividiturquè in æqualiter inæqualem & in inæqualiter inæqualem, uterquè inæqualis existit cum hac tamen distinctione, quod ille inæqualitatis suæ gradus servet perpetuos sive quod semper cum eadem inæqualitate, quæ semel inter explorandum deprehensa est, recurrat. v. g. si magnitudinis gradus in singulis pulsus vibrationibus sensim deficere percipitur e. gr. ad decimum quintum usquæ ictum & tùm in pristinum semper magnitudinis gradum restituitur, iterumquè tamdiu deviat: Inæqualiter inæqualis hac cognoscitur ratione, quando v. c. in eodem exemplo pristina magnitudo mox post decimum, mox post vigesimum, mox trigesimum ictum & sic semper mutato numero vertitur ad pristinum aut non planè eundem statum; ex superius allatis manifesta est ratio, omnem pulsum inæqualem haud bonæ esse significationis, præcipuè si alia mala signa adfuerint, exempla jam jam dictorum secundum differentiarum seriem apponere possemus, qualia habemus v. g. ratione magnitudinis in myuro, respectu celeritatis in undoso, vermiculante, ferrato & formicante, ratione crebritatis in dicrotò, palpitante & convulsivò, respectu frequentiae in intermittente ac deficiente &c. ast pagellarum angustia prohibet quò minus differentias has singulatim, inceptâ methodò perlustrare queamus, certâ freti spe L. B. ex hæcenus dictis rationes earum sine difficultate investigare posse.

§. XX.

Tandem sextò, pulsus dispescitur in durum & mollem; Durus, progenies videtur celeris & magni ab influxu

fluxu motûs spirituum æqualiter facto, simul excitatorum, digitos enim explorantium instar chordæ crassioris cum sensibili resistantia duritiem referente, (undè & nomen forsan adeptus est) sat fortiter ferit, indè vi superius dictorum bonæ significationis esse solet, præcipuè si æqualitatem servet, interim semper ægrum in febrem proclivem, aut febriculam jam adessè, cæteris paribus indicat: mollis verò, ex debili & tardo provenire deprehenditur, quoniam expiscantis eundem digitos leniter & molliter, ac si gossipii funiculus levissimè ac parûmpèr contortus ipsis admoveatur, vibrationibus suis percutit: semper mali ominis esse & morbum periculo plenum indicat. Atque sic sententiam nostram tam rationibus, quam experientiâ probatam confirmatamve esse speramus.

OBSERVATIO ANATOMICA CURIOSA

ac rara

De

CORDE SINE PERICARDIO.

NE L. B. pagella hæc vacua exponatur oculis tuis, placuit confirmare fidem Columbi, è cujus Libr. XV. anatom: Joh. Georg. Schenck observat. Libr. II. de pericard. & Cord. obs. V. p. m. 292. pericardio destitutum discipulum quendam in accademia Romana observasse ipsum refert, quam vacillantem reddere, ob observationis raritatem, non pauci conati sunt, ut Daniel Taurvry in Anatomia sua nova part. I. cap. II. pag. m. 59. asserere non vereatur, quod impossibile sit, cor sine pericardio

dio reperiri posse, quin per incuriam anatomicorum aut
 disruptum id fuerit aut cordi intimius adnatum & aggluti-
 natum, quamvis in canibus & glire tale quid inventum
 concedat; pace tamen aliorum, dicemus quæ certo certi-
 us vidimus in vidua Chirurgi cujusdam Sackheimensis
 Nathan dicti, erat hæc obesioris corporis habitus & post
 casum ex inversa traha, & perfrigerationem magnam in
 itinere longo incidebat in febrem acutam, quæ ipsam anno
 MDCCIX. die XXIV. Martii jugulavit, ubi subsequente
 XXV. ad obductionem à filiabus ipsius & amicis rogatus
 cum quibusdam auditoribus ejus temporis meis in ædes
 ipsorum me contuli, ubi sectionem instituyente Chirurgo,
 omnia observavimus viscera & accurate observata omnia
 consignavimus, inter alia autem præcipue cor sine peri-
 cardio cujus ne vestigium quidem reperiri licuit utut sol-
 licite desideratissimeque id quæreremus,prehendimus,
 sed institutâ quamvis accuratissimâ ac perspectissimâ in-
 vestigatione, ejus locô levi muco obductum videba-
 tur cor, omni firmitate, densitate & soliditate destituto,
 qui etiam facile abstergi poterat, nec ulla ratione pericardii
 vices supplere, quare certum esse credimus dari
 sæpius homines pericardio carentes, utut
 rarius ii observentur,



Serenissime Princeps, Domine Clementissime,



Id multumquē animō volvi ac revolvī
meō, num tenues has studiorum meorum
primitias Tibi, Princeps Illustrissime,
consecrarem, Sublimique Tuo inscribe-
rem Nomini. Absterrebat me quippē
ab altera parte non solum Celsitudo
Tanti Principis; sed & materiæ, quæ
hisce continetur pagellis tenuitas & personæ meæ vilitas ab
audaci me retrahebat conatu; Ab altera verò parte me in-
vitabat ac calcar animo admovebat trepidanti, Rara quæ in
Te est, Princeps Clementissime, Gratia & Humanitas erga
quosvis Tui Nominis veneratores devotissimos. Utut jam
initio mihi de pulsu cordis & arteriarum disserturo, cor
vehementer palpitaret, omnesque arteriæ præ metu con-
tremiscerent, superavit tandem fiducia metum! Quamprī-
mum enim Incomparabilem Tuam (quā innumeros alios, in
pari dignitatis fastigio collocatos Principes, ut Sol plane-
tas, Adamas gemmas, Aquila cæteros alites multis superas
parafangis) Clementiam ad animum mihi revocabam, il-
licò omnis pavor tremulus cor pavidum reliquit & humilli-
ma fiducia cum veneratione submissa sociata animum roborava-
vit fluctuantem, ut præsentem Disputationem Academicam
Tibi

Tibi, Domine Clementissime, humillimè consecrarenon du-
bitârim. Suscipe igitur Princeps Serenissime, perexiguum
hoc submissæ devotionis signum, & benignissime patiaris
disputationem hanc sub Nominis Tui felicissimis auspiciis in
publicum prodire. Si fortè temeritatis & audaciæ culpandæ
hic videar incurrisse crimen (quod Tanto Principi tam exi-
guum Tantæque Celsitudini planè impar munusculum char-
taceum offerre non erubuerim) sperare me jubet Singularis
Tua (quam disertissima fama jam pridem ad remotissimas
deportavit oras, quâque & alios fidos servos & patrem meum
senem innumeris erexisti modis) Clementia, Te, Principum
Sidus Lucidissimum, hanc mihi culpam, quam devotio Tibi
devinctissima, committere svasit, facile condonaturum. Vi-
ve interim Fulgidissima Principum Corona diu felix, Vive so-
spes, Vive incolumis; Dominus Exercituum Tuum sufful-
ciat solium Principale per multas annorum felicium decurias
adversus omnes fluctus & procellas inconcussum, ut Pro-
vinciis Tuis, Te Patrem Patriæ, jam pridem anxie anhelan-
tibus, diu & feliciter præesse ac omnibus bonis prodesse que-
as, donec tandem non nisi Serus ac annis Onustus ad capef-
fenda regna cœlestia ad astra transferaris. Id quod ex inti-
mis cordis anfractibus, calidissimè vovet precaturque

Princeps Serenissime
Celsitudinis Tuæ, Domini sui Clementissimi

devotissimus ac humillimus servus
ULRICUS WILHELMUS RHODE,
Curonus, Med. St.